



Pregunta Frekuenta i Nan Kontestanan (Q & A)

Aki ta sigui e preguntanan mas frekuenta ku nos ta risibí for di e bankonan komersial relashoná ku atendentu ku fianza den e situashon di COVID-19.

Pregunta 1: Kon mi mester trata fianza ku a risibí prolongashon di moratorio despues di e seis (6) lunanan inisial ku CBCS a duna pèrmit p'e?

Kontesta 1: CBCS no ta rekomendá pa sigui duna mas moratorio di pago den kuadro di su reglanan prudensial.

No opstante, e institutonan finansiero por sigui evaluá, pa kada kaso individual, ki sosten nan por ofresé nan klientenan. Si prolongá un moratorio den kuadro di un restrukturashon i/òf renobashon di un akuerdo formal tokante pago relashoná ku fianza, mester kuminsá trata e krédito akí komo un fianza improduktivo (non-performing) for di 90 dia despues di e fecha ku e kliente lo mester a kuminsá paga atrobe. Si a duna e moratorio sin kambia e kondishonnan di fianza, mester trata e krédito komo un fianza improduktivo for di 90 dia despues di 30 di sèptèmber 2020. Den un kaso asina, si ta trata di un fianza sin garantia, mester krea un provishon di 100% pa pèrdida riba fianza. Si ta trata di un fianza ku garantia, sea asina bon di wak paragraf IV.5.A (*Provisioning Policy Concerning SPLL, except for consumer installment loans*) di nos *Supervisory Regulation IV – Regulation concerning General and Specific Provisions for Loan Losses of Credit Institutions*¹ (“SR IV”) pa determiná e porsentahe di provishon ku mester krea den e kaso spesífiko. Kada bes ku un instituto finansiero determiná ku probablemente e lo no logra kobra henter un suma ku tin habrí, tantu di interes komo di kapital, mester depresiá e krédito inmediateamente den e instituto su bukinan (sea via un depresiashon direkto òf kreando un provishon p'e).

Pregunta 2: Kon mi mester trata fianza ku no a risibí prolongashon di moratorio despues di e seis (6) lunanan inisial ku CBCS a duna pèrmit p'e?

Kontesta 2: Un institushon finansiero mester sòru di kumpli kontinuamente ku e normanan prudensial vigente, inkluso ku SR IV.

Pregunta 3: Mester restrukturá e fiansananan despues ku nan moratorio kaba di pasa?

Kontesta 3: Ta animá e institutonan finansiero pa restrukturá fianza riba base individual i konforme e normanan prudensial vigente, despues di a evaluá e debitor su situashon finansiero i su kapasidat di krédito.

¹ <https://www.centralbank.cw/legislation-guidelines/credit-institutions/supervisory-regulations>

No opstante, restrukturashon di fianza no ta obligatorio.

Pregunta 4: Ta permití restrukturashon general di fianza?

Kontesta 4: Nò. Un institushon finansiero mester reevaluá riesgo di su fiansanan riba base individual, tumando na kuenta e karakterístikanan di e debitor.

Pregunta 5: E fiansanan ku a risibí moratorio inisialmente mester ser klasifiká komo improduktivo ora nan periodo di moratorio inisial pasa?

Kontesta 5: Un instituto finansiero no mester kambia klasifikashon di krédito di un fianza inmediatamente den kaso ku risibí un moratorio p'e. Un moratorio riba su mes no ta nifiká ku mester reklasifiká e krédito, a ménos ku e tabata klasifiká kaba komo improduktivo na momento ku a otorgá e moratorio.

Pregunta 6: Na ki momento un instituto finansiero mester kambia klasifikashon di un fianza?

Kontesta 6: Segun ku e instituto finansiero optené mas informashon konkreto i konfiabel riba situashon finansiero di su debitornan i di nan kapasidat di paga bou di e kondishonnan nobo di fianza, e mester evaluá si tin un nesidat pa kambia klasifikashon di sierto fianza. Mas informashon tokante kon mester sigui trata e fiansanan akí ta disponibel den nos SR IV.

Pregunta 7: Na ki momento un instituto finansiero mester kuminsá konta e dianan di atraso pa un fianza ku a risibí e moratorio inisial?

Kontesta 7: Pa fianza ku a risibí e moratorio inisial, un instituto finansiero mester kuminsá konta e dianan di atraso for di 30 di sèptèmber 2020. Sea asina bon di konsultá e instrukshonnan di SR IV pa sa kon mester sigui trata e fiansanan akí.

Pregunta 8: Na ki momento un instituto finansiero mester kuminsá konta e dianan di atraso pa un fianza ku a ser restrukturá despues di e moratorio inisial?

Kontesta 8: Pa fianza ku a ser restrukturá despues di e moratorio inisial, e instituto finansiero mester determiná e fecha pa kuminsá konta e dianan di atraso di akuerdo ku loke e kondishonnan di fianza revisá ta stipulá. Sea asina bon di sigui e instrukshonnan di paragraf IV.5.C.2 (*Provisioning policy concerning restructured troubled loans*) di nos SR IV tokante kon mester sigui trata e fiansanan akí.

Pregunta 9: Banko Sentral a kambia e reglanan pa klasifikashon di pèrdida riba fianza i e rekisitonan tokante provishon debí na COVID-19?

Kontesta 9: Nò. E situashon relashoná ku COVID-19 i e klima ekonómiko aktual ta pone ku e institutonan finansiero mester keda evaluá kapasidat di krédito di nan fiadónan riba un base regular i

aktua ku sano huisio. Mester krea provishon adekuá pa pèrdida riba fianza konforme loke tin stipulá den SR IV i komplementá esakinan ku e rekisitonan stipulá den IFRS9, teniendo kuenta ku e implikashonnan di esaki pa perspektiva ekonómiko i tambe ku reevaluashon di balor di garantia.

Pregunta 10: Na ki momento un instituto finansiero mester depresiá fianza (sea via un depresiashon direkto òf kreando un provishon p'e) debí na COVID-19?

Kontesta 10: Kada bes ku un instituto finansiero determiná ku probablemente e lo no logra kobra henter un suma ku tin habrí, tantu di interes komo di kapital, mester baha e debe ei inmediateamente den e instituto su bukinan (sea via un depresiashon direkto òf kreando un provishon p'e).